

A portrait of an elderly man with grey hair, wearing a dark fedora and a grey knit scarf. He is looking slightly to the right with a serious expression. The background is a brick building with a tiled roof. The entire image is framed by a thick blue border.

Ivo, Orašje

Evropska unija i UNDP
nastavljaju pružati pomoć
porodicama pogođenim
poplavama i klizištima
2014. godine

PROGRAM ZA OPORAVAK OD POPLAVA - STAMBENO ZBRINJAVANJE

Katastrofalne poplave, najteže u posljednjih 120 godina, zadesile su Bosnu i Hercegovinu u maju 2014. godine. Poplave su obuhvatile četvrtinu teritorija države i pogodile oko million osoba.

Kako bi se ublažile posljedice ove prirodne nepogode, osmišljen je Program za oporavak od poplava - Stambeno zbrinjavanje. Ovaj Program ima za cilj da stambeno zbrine **skoro 3,000 osoba** čiji domovi su oštećeni ili uništeni u poplavama 2014. godine, **te ekonomski osnaži 555 najugroženijih porodica**.



Vrijednost Programa je 15 miliona eura, a finansira ga Evropska unija, u iznosu od 12,5 miliona eura u saradnji sa Vladom Federacije Bosne i Hercegovine, Vladom Republike Srpske, UNDP-om i lokalnim vlastima. Program implementira UNDP u BiH zajedno sa Međunarodnom organizacijom za migracije (IOM), Arbeiter-Samariter-Bund (ASB), Hilfswerk International Austria (HWA) i partnerskim opštinama i gradovima.

Program se implementira u 44 opštine/grada: Banja Luka, Bijeljina, Bratunac, Brod, Cazin, Doboj, Doboj Istok, Domaljevac-Šamac, Donji Žabar, Goražde, Gračanica, Gradiška, Jezero, Kakanj, Kalesija, Kostajnica, Laktaši, Lopare, Maglaj, Modriča, Novi Grad, Odžak, Orašje, Petrovo, Prijedor, Prnjavor, Sapna, Srbac, Srebrenik, Šamac, Šekovići, Šipovo, Teslić, Tešanj, Travnik, Tuzla, Ugljevik, Vareš, Vlasenica, Vogošća, Zavidovići, Zenica, Zvornik i Žepče.

Šta radimo?



**Stambeno zbrinjavanje skoro
3,000 osoba**



**Ekonomsko osnaživanje 555
domaćinstava**



Hasida, Kalesija

Porodica Imamović iz Kalesije već četiri godine živi u kući na klizištu koje se pokrenulo nakon rekordnih padavina 2014. godine.

"Zamislite kako bi bilo da ste vi u ovakvoj situaciji" odgovara Hasida Imamović na pitanje o tome kako je živjeti u domu koji samo što se nije srušio.

"Jašta da nas je strah. Kako nas ne bi bilo strah? Pogotovo kad kiša krene padati, iz dana u dan" priča Hasida. "Bilo je mnogo nespavanih noći od kada se klizište pojavilo".

Imamovići su jedna je od skoro hiljadu porodica koje su izabrane za učešće u Programu za oporavak od poplava - Stambeno zbrinjavanje. U sklopu ovoga Programa, Imamovićima će na sigurnoj lokaciji biti izgrađen novi dom tako da više neće morati strahovati od sljedeće kiše.



Hasida i njena 6-godišnja kćerka Irma skidaju ogledalo kojim prikrivaju ispucale zidove.



Zdravko, Bijeljina

"To je strahota bila, tolika je sila naišla. Do struka sam vodu gazio" prisjeća se Zdravko katastrofalnih poplava koje su pogodile BiH u maju 2014. godine.

Više od 15.000 objekata bilo je potopljeno u Bijeljini, uključujući i Zdravkovu skromnu montažnu kuću. Pored ogromne štete na kući, poplava je Zdravku uništila i sav ječam koji je te godine posadio. "Sve se to desilo za pola sata. Voda je probila kanal i krenula" opisuje on.

Nakon četiri godine života u vlažnoj i neuslovnoj kući, Zdravko i njegova porodica raduju se poboljšanju svojih životnih uslova.

Naime, kroz Program za oporavak od poplava - Stambeno zbrinjavanje Zdravkovoj šestočlanoj porodici će biti izgrađen novi dom. „Mnogo mi je porodica radosna“ jednostavno kaže Zdravko.



Program za oporavak od poplava - Stambeno zbrinjavanje



Dušanka i Đorđa, Modriča

Dušanka i Đorđa su novopečeni bračni par. Đorđa sa osmijehom priča kako je Dušanku nekoliko godina nagovarao da se preseli iz rodne Slavonije u Modriču. Njihov skromni dom u opasnosti je od klizišta koje se pojavilo 2014. godine.

"Bio sam u kući kad je klizište krenulo, u toku noći. Mi i dan danas spavamo pod strahom. Svaki put kad kiša padne, gledam hoće li krenuti" kaže Đorđa.

Kad su ga obavijestili da je prošao na Javnom pozivu za izbor korisnika Programa za oporavak od poplava - Stambeno zbrinjavanje, i da će mu biti izgrađen novi dom, Đorđa "nije mogao vjerovati".

"Osjećam se sigurnije. Znam da ću dobiti dom" kaže on. I Dušanka je bila sretna. "Meni je baš, baš drago. Ne kažem da njemu nije, ali meni je baš drago što ćemo dobiti novu kuću".



Ana, Žepče

"Navečer me najviše strah. Legnem i uvijek nešto pucketa. Kuća se miče" priča 53-godišnja Ana. Čak i da ne čuje zvukove, duge žućkaste trake kojima je pokušala zalijepiti pukotine iznad uzglavlja kreveta podsjećaju je da se njen dom raspada. Doslovno. Strah od mogućeg urušavanja, natjerao je Anu da ove zime napusti spavaću sobu i počne spavati u kuhinji, odmah do ulaznih vrata. „Najsigurnije je“ kaže ona.

Ana, njen 13-godišnji sin Ivan i 21-godišnja kćerka Valentina već skoro četiri godine žive u opasnosti. Njihov dom ispresijecan je dubokim pukotinama prouzrokovanim klizištem koje se, nakon rekordnih padavina 2014. godine, pokrenulo u neposrednoj blizini.

„Sin, tada mu je bilo deset, je jednom došao i rekao da kod kuma njegovog prijatelja ima ljepilo, te da bi on i prijatelj mogli zalijepiti kuću nazad“ govori tiho Ana.

Program za oporavak od poplava započeo je Javnim pozivom za izbor korisnika na koji se prijavila i Anina porodica. Po završetku procesa, Anu je čekala dobra vijest: njena aplikacija je prihvaćena i porodici će biti izgrađen novi dom.

„Svi smo bili veseli kad smo to saznali“ kaže Ana i priznaje da njen sin nije mogao spavati od uzbuđenja kada je saznao da će dobiti novi dom.



Program za oporavak od poplava - Stambeno zbrinjavanje



Ovaj projekt finansira
Evropska unija

PROGRAM ZA OPORAVAK OD POPLAVA - STAMBENO ZBRINJAVANJE



Empowered lives.
Resilient nations.

Program za oporavak od poplava predstavlja nastavak napora Evropske unije na ublažavanju posljedica katastrofalnih poplava koje su pogodile Bosnu i Hercegovinu 2014. godine. Prva faza Programa, provedena od augusta 2014. do februara 2016. godine, postigla je impresivne rezultate **poboljšavajući uslove života za 610.000 stanovnika** diljem Bosne i Hercegovine.

Ovaj Program podržava sljedeće Ciljeve održivog razvoja:



Copyright: UNDP BiH, 2018; Fotografije: Aida Šunje, Jim Marshall; www.ba.undp.org

Ova publikacija je nastala uz podršku Evropske unije. Sadržaj ove publikacije je isključiva odgovornost Programa za oporavak od poplava - Stambeno zbrinjavanje i ne predstavlja nužno stavove Evropske unije.